

Usihukumu,

Msihukumu, msije mkahukumiwa ninyi. Kwa kuwa hukumu ile mhukumuyo, ndiyo mtakayohukumiwa; na kipimo kile mpimiacho, ndicho mtakachopimiwa.

Mathayo 7:1, 2.

Ninaelewa namna adui anavyofanya kazi na ninatamani kusema kwa kila nafsi “Msihukumu, msije mkahukumiwa ninyi. Kwa kuwa hukumu ile mhukumuyo, ndiyo mtakayohukumiwa; na kipimo kile mpimiacho, ndicho mtakachopimiwa.” Kuna wakati tunatakiwa kuwa na msimamo thabiti, lakini katika kumtukuza Bwana hakikisha kuwa hushutumu wala kuwashtaki wengine. Ikiwa watu wetu watagawanyika katika makundi makundi, jambo hili litasababisha nguvu zote za kuzimu kushangilia.

Njia ya ushindani na utengano imeandaliwa. Wengi wapo katika hatari kubwa ya kuangukia kwenye ukafiri. Sasa hebu kusudi lako liwe ni kuokoa roho hizi zilizo hatarini. Nina huzuni, huzuni kuu, ya moyoni, kwamba hawaelewi mienendo yao...

Kuna jambo moja unaloweza kufanya. Unaweza kuhakikisha kuwa wewe mwenyewe upo katika hali ya kufanya toba. Mioyo yenu inahitaji kuongolewa. Mwisho unakaribia; muda ni mchache. Mlilie Mungu; safisha njia kuu ya Mfalme; na inua juu bendera iliyoandikwa, “Amri za Mungu na imani ya Yesu.” Unaposonga mbele hatua kwa hatua, paza sauti, “Hao wazishikao amri za Mungu na imani ya Yesu.”

Musa alitangaza kuwa, “Angalieni nimewafundisha amri na hukumu, vilevile kama BWANA alivyoniaturu, ili mazitende katika nchi mwingiayo ili kuimiliki. Zishikeni basi, mkazitende, maana hii ndiyo hekima yenu na akili zenu, machoni pa mataifa watakozisikia amri hizi zote, nao watasema, Hakika taifa hili kubwa ni watu wenye hekima na akili... Lakini jihadhari nafsi yako, ukailinde roho yako kwa bidii, usije ukayasahau mambo yale uliyoyaona kwa macho yako, yakaondoka moyoni mwako siku zote za maisha yako; bali uwajulishe watoto wako na watoto wa watoto wako.” (Kumbukumbu 4:5-9) (Letter 30, 1906)

Mwokozi kwa uwazi anasema, “Kwa kuwa hukumu ile mhukumuyo, ndiyo mtakayohukumiwa” ... Nani anaweza kusimama mbele za Mungu na kujitetea kuwa ana tabia isiyo na kosa na maisha yasiyo na mawaa? Na sasa unadiriki vipi, kumkosoa na kumhukumu ndugu yako? Wale walio na tumaini la wokovu kupitia kwa matendo mema ya Kristo pekee, watakaotafuta msamaha kupitia kwa damu Yake, wako chini ya wajibu mkuu wa kuonesha upendo, huruma na msamaha kwa wadhambi wenzao...

Unapowahukumu wenzako, Bwana atakuhukumu pia... Hebu Bwana aguse moyo wa kila mshiriki, hadi pale neema Yake ibadilishayo ionekane katika maisha na tabia. Kisha mnapokutana pamoja isiwe kwa ajili ya kukosoana, bali kuzungumza habari za Yesu na upendo Wake (**The Review and Herald, Novemba 30, 1886**)